



Inisiatif Payung Rahmah diteruskan sebagai agenda nasional negara - Armizan

Disember 14, 2023 @ 7:13pm

PUTRAJAYA: Inisiatif Payung Rahmah diperkenalkan Allahyarham Datuk Seri Salahuddin Ayub akan diteruskan kerana ia agenda nasional negara, kata Menteri Perdagangan Dalam Negeri dan Kos Sara Hidup yang baharu, Datuk Armizan Mohd Ali.

Beliau berkata, inisiatif Payung Rahmah itu akan diperkasa bukan hanya membabitkan Kementerian Perdagangan Dalam Negeri dan Kos Sara Hidup (KPDN), malah merangkumi beberapa kementerian lain.

"Ia (Rahmah) jadi agenda nasional bukan hanya kementerian semata-mata, tetapi ia memayungi kebijakan dan kesejahteraan kepada rakyat," katanya ketika sidang media selepas perasmian Karnival Barang Malaysia oleh Perdana Menteri, Datuk Seri Anwar Ibrahim di sini hari ini.

Salahuddin ketika menerajui KPDN melaksanakan pelbagai inisiatif di bawah Payung Rahmah bagi membantu rakyat menghadapi pelbagai cabaran berhubung kenaikan kos sara hidup terutama ketika negara dan ekonomi sedang pulih daripada kesan pandemik COVID-19.

Anwar yang juga Menteri Kewangan sebelum ini dilaporkan berkata, kerajaan memberikan suntikan peruntukan RM200 juta bagi inisiatif Payung Rahmah untuk tahun depan menerusi Belanjawan 2024 Malaysia MADANI. – BERNAMA